

Pronto obra artistico Lolita lo keda instala na San Nicolas brindando homenahe na e hende muher Afro Caribense liber




ORANJESTAD (AAN): Cu hopi placer y orguyo Ministerio di Cultura, a informa cu a ricibi bishita di e artista Gilbert Senchi conhuntamente cu miembro di fundacion ARTopia y a ricibi invitacion di e vernissage di e obra artistico yama Lolita.

Di acuerdo cu vision di Ministerio di cultura sosteni pa Pais aruba pa asina sigui identifica San Nicolas como e capital cultural di Aruba, a tuma e pasanan pa colabora

cu e artista Gilbert Senchi pa asina crea e obra artistico aki cu yama **Lolita**.

E autenticidad cu ta worde asocia cu San Nicolas ta Danki na e ciudadanonan cu ta biba eynan cu ta worde mira como e vehiculo di e cultura presente cu ta hopi importante pa Aruba. Pa e motibo aki a tuma pasonan cardinal pa inverti den infraestructura cultural na e capital akinan, esaki ta reconoci pa Ministerio di Cultura y Pais Aruba.



Por papia di diferente proyecto, manera e revitalisacion di area di Promenade, restauracion di Watertoren cu aworaki ta e Museum Industrial, restauracion di Nicolas Store cu dentro di poco lo bira e museum comunitario. Tambe por papia di e apertura cu lo tuma luga pronto di Trilex Building cu lo ta e "Cosecha workshop space", como tambe den fin di september e Art Fair cu tabata hopi popular y bon bishita pa nos comunidad



local. Asina contribuyendo na e autenticidad y e aspecto cultural di San Nicolas.

Yegando na culminacion mester bisa cu pronto lo instala e obra artistico di Lolita. E obra aki ta unico pasobra ta e prome biah cu un hende muher Afro Caribense ta worde reconoci den su forma

liber den region di Caribe, algo cu sigur un biah mas lo pone Aruba riba mapa Cultural Internacional. E obra aki no ta trata di e storia di Lolita solamente, sino cu e ta representante di e hende muher Afro Caribense y asina duna homenahe na esaki.